

Umsögn um tillögu biskupafundar varðandi sameiningu Breiðabólstaðar- og Melstaðarprestakalla.

Mánudaginn 7. febrúar sl. tók sóknarnefnd Hvammstangasóknar til umræðu tillögu biskupafundar, dagsetta 2. nóvember 2021, varðandi sameiningu Breiðabólstaðar- og Melstaðarprestakalla.

Tillagan gengur efnislega út á að Breiðabólstaðar- og Melstaðarprestaköll verði sameinuð. Það kemur ekki fram í tillögunni sjálfri hvort hinu sameinaða prestakalli verði þjónað af einum presti eða tveimur en undanfarna áratugi hefur einn prestur þjónað hvoru prestakalli um sig. Hins vegar má lesa í greinargerðinni að einungis er gert ráð fyrir einum presti í sameinuðu prestakalli þrátt fyrir að það gangi gegn stefnu biskupafundar um sameiningu prestakalla þar sem fleiri prestar vinni saman og jöfnun á þjónustubyrði milli presta. Þarna leggur því biskupafundur fram tillögu sem gengur gegn eigin stefnu og hugmyndafræði.

Samstarf hefur verið á milli prestakallanna um margra ára skeið t.a.m. í barna- og æskulýðsstarfi, fermingarfræðslu, öldrunarstarfi, vitjunum og kapellustundum á sjúkrahúsi, heimsóknarvinastarfi, kirkjukórastarfi o.fl. Allt þetta starf hefur verið rekið meira og minna á Hvammstanga enda er þar staðsettur leikskóli og grunnskóli sveitarfélagsins sem og sjúkrahús og heilsugæsla héraðsins auk íbúða og félagsstarfs fyrir aldraða. Ef prestaköllinn verða sameinuð mun allt starfið lenda á Hvammstangasókn og þá mun Hvammstangasókn þurfa að innheimta gjald frá dreifbýlissóknunum fyrir alla aðstöðu og þjónustu, vegna barna og ungmenna úr dreifbýlinu, sem sækja barna- og æskulýðsstarf í Hvammstangasókn. Hingað til hefur það ekki verið innheimt vegna þess að litið hefur verið svo á að sá hluti barnastarfsins sem Melstaðarprestur hefur tekið að sér sé framlag sókna þess prestakalls til samstarfsins auk þess sem ekki er úr miklu fjármagni að spila hjá fámennum sveitasóknum.

Í ljósi þess, sem kemur fram í greinargerð með nefndri tillögu, þ.e. fækkun stöðugilda þjóðkirkjunnar í hinu sameinaða prestakalli vill sóknarnefnd Hvammstangasóknar koma á framfæri áhyggjum sínum af slíkum niðurskurði og skertri þjónustu þjóðkirkjunnar á landsbyggðinni. Þar er um byggðamál að ræða og hvert starf á landsbyggðinni er afar dýrmætt og mikilvægt fyrir samfélagið og byggðina. Það er erfitt að bera saman störf presta í hinum dreifðu byggðum og presta á höfuðborgarsvæðinu. Prestar á landsbyggðinni þurfa t.d. oft að fara um langan veg til að sinna vitjunum, fundahöldum, prestsverkum og helgihaldi og þjóna þannig mörgum sóknum. Prestarnir í Breiðabólstaðar- og Melstaðarprestakalli sinna helgihaldi í 12 Guðshúsum, þjóna í 8 sóknum og starfa með 8 sóknarnefndum.

Kirkjuleg þjónusta mun óhjákvæmilega skerðast verulega ef einn prestur verður látinn bera þá byrði sem áður var á herðum tveggja presta og mun þá álagið augljóslega aukast mjög mikið á þann prest sem eftir situr í sameinuðu prestakalli eins og lagt er upp með í tillögu biskupafundar. Af ofangreindum ástæðum leggur sóknarnefnd Hvammstangasóknar ríka áherslu á að sóknarprestsstaðan sem losnar þegar sóknarpresturinn á Melstað lætur af störfum verði auglýst þannig að sá sóknarprestur sem ráðinn yrði gæti þá haldið áfram því samstarfi sem verið hefur á milli Breiðabólstaðarprests og Melstaðarprests. Þeir gætu þá létt undir hvor með öðrum í reglubundu helgihaldi og safnaðarstarfi, skipt með sér vöktum og leyst hvorn annan af í helgar- og sumarleyfum og þar með haldið áfram eðlilegri og góðri þjónustu við sín sóknarbörn eins og þjóðkirkjunni ber að gera.

Að teknu tilliti til ofangreindra þátta; þ.e. fækkun stöðugilda, skertri þjónustu við sóknarbörn og auknu álagi á eftirsitjandi prest lýsir sóknarnefnd Hvammstangasóknar sig alfarið á móti sameiningu prestakallanna.

F.H. Sóknarnefndar Hvammstangasóknar

Jóhannes Kári Bragason, formaður